

Bosna i Hercegovina

Босна и Херцеговина

**Sud Bosne i Hercegovine
Суд Босне и Херцеговине**

Broj: S1 3 IŽ 039886 21 IŽ
Sarajevo, 03.03.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Zvezdane Antonović, predsjednik vijeća, Mirsade Džindo i Vesna Trifunović, članovi vijeća, odlučujući o žalbi žalitelja Katica Velije, ulica Nahorevska broj 110 Sarajevo, izjavljenoj protiv Odluke Centralne izborne komisije Bosne i Hercegovine, broj: 06-1-07-3-105/21 od 26.02.2021.godine, na nejavnoj sjednici, održanoj dana 03.03.2021.godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeni su rezultati posrednih izbora i dodjeljeni mandati iz Općinskog vijeća Centar Sarajevo za Gradsko vijeće Grada Sarajeva.

Protiv navedene odluke, žalitelj je izjavio žalbu, i to zbog bitnih povreda odedaba Izbornog zakona BiH i Statuta grada Sarajeva, zbog pogrešno i nepotpuno utvrđenog činjeničnog stanja, te zbog pogrešne primjene propisa, te je predložio da se ista usvoji, a pobijana odluka vrati CIK-u na ponovno odlučivanje ili da se donese druga pravična odluka.

U obrazloženju žalbe navodi da je na posrednim izborima u Općini Centar po količniku bio rangiran na peto mjesto liste za Gradsko vijeće Grada Sarajeva, od mogućih sedam koliko se bira iz svake od četiri gradske općine, te da se izjašnjava kao ostali. Nadalje navodi daje odredbom člana 23 stav (5) Statuta grada Sarajevo propisano da općinsko vijeće u kojem je zastupljen veći broj općinskih vijećnika iz reda određenog konstitutivnog naroda odnosno iz reda ostalih, ima obavezu delegirati u Gradsko vijeće, srazmjerno veći broj vijećnika pripadnika pojedinog konstitutivnog naroda, odnosno vijećnika iz reda ostalih. Ističe da je pravilnom primjenom citirane odredbe Općinsko vijeće Centar Sarajevo imalo obavezu delegirati veći broj vijećnika iz reda ostalih od propisanog minimuma. Nadalje navodi da je politička organizacija građana Naša stranka, iako je imala kandidata iz reda srpskog naroda (Arslanagić Saru) istu nije kandidovala na listu za Gradsko vijeće nego je povukla kandidata

Sud Bosne i Hercegovine, Sarajevo, ul. Kraljice Jelene br. 88

Telefon: 033 707 100; Fax: 033 707 321

iz Doma naroda Parlamenta FBiH (Stevanović Dragana) koji se odrekao mandata i time ugrozio fiinkcionisanje kako parlamenta, tako i kluba Srba u tom tijelu. Isto tako navodi da su Politički subjekti Narod i pravda i Naša stranka, udružujući kandidate na listi, za nosioca liste stavili Zulfikarpašić Amru, što je rezultiralo da ta lista dobije osam glasova, dok su preraspodjelom mandata sa ove liste izabrana tri kandidata za gradsko vijeće (Bošnjak, Srbin i Hrvat) iako dva kandidata sa ove liste imaju manji količnik od podnositelja žalbe. Navedeni kandidati su stavljeni na listu pod brojem 4 i 6, iako je Statutom Grada Sarajeva definisano da ako ima manje kandidata iz reda konstitutivnih naroda ili iz reda ostalih da isti moraju biti favorizovani na listi.

U odgovoru na žalbu, Centralna izborna komisija BiH predložila je da Sud predmetnu žalbu odbije kao neosnovanu jer je ožalbena odluka donesena na pravilan i potpun način, u skladu sa odredbama Izbornog zakona BiH i podzakonskih akata.

Žalba je neosnovana.

Iz stanja spisa proizilazi da je Centralna izborna komisija BiH je na osnovu člana 2.9 stav (1) tačka 9, a u vezi sa članom 13.10 i članom 13.5 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20) i Poglavlja VI. Uputstva o postupku provedbe posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine („Službeni glasnik BiH“, br. 38/14, 90/16, 8/17 i 91/18) donijela Odluku o utvrđivanju rezultata posrednih izbora i dodjeli mndata iz Općinskog vijeća Centar Sarajevo za Gradsko vijeće Grada Sarajeva. U postupku koji je prethodio donošenju ožalbene odluke, Centralna izborna komisija Bosne i Hercegovine izvršila je uvid u cjelokupan materijal o provedenim posrednim izborima dostavljen od Općinskog vijeća Centar Sarajevo broj: 01-45-71/21 od 10.02.2021. godine.

U skladu sa članom 22. Statuta Grada Sarajeva („Službene novine Kantona Sarajevo" br. 12/98, 14/98, 25/05, 23/08 i 32/08) svako općinsko vijeće vrši izbor po sedam (7) delegata u Gradsko vijeće.

U postupku izbora vijećnika za Gradsko vijeće Grada Sarajeva, od 31 vijećnika u Općinskom vijeću Centar Sarajevo, glasali su svi vijećnici za prethodno ovjerenih šest (6) kandidatskih listi.

U Zapisniku Komisije za utvrđivanje rezultata glasanja za izbor vijećnika Gradskog vijeća Grada Sarajeva iz Općinskog vijeća Centar Sarajevo navedeno je daje od 31 glasačkog listića na kojim je glasao 31 vijećnik Općinskog vijeća Centar Sarajevo, 29 važećih glasačkih listića, 2 nevažeća glasačka listića, te jedan neiskorišten glasački listić.

Na osnovu uvida u dostavljeni materijal utvrđeni su sljedeći rezultati:

1. kandidatska lista političke stranke POLITIČKA ORGANIZACIJA NAROD I PRAVDA, dobila je **sedam (7) glasova**,
2. kandidatska lista grupe vijećnika KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJAIGVTICA, dobila je **tri (3) glasa**,
3. kandidatska lista grupe vijećnika ČOSOVIĆ, KHATTAB, MUHAREMOVIĆ, ŠLJIVO, ŠENDEROVIĆ, dobila je **pet (5) glasova**,
4. kandidatska lista političke stranke POG NAŠA STRANKA dobila je **šest (6) glasova**,
5. kandidatska lista političke stranke SAVEZ ZA BOLJU BUDUĆNOST, dobila je **nula (0) glasova**,
6. kandidatska lista grupe vijećnika ZULFIKARPAŠIĆ, STEVANOVIĆ, MAJSTOROVIĆ dobila je **osam (8) glasova**.

Odredbom člana 13.10 stav (2) Izbornog zakona Bosne i Hercegovine propisano je „da mandati za gradsko vijeće, odnosno skupštinu grada dodjeljuju se kandidatskim listama po sistemu proporcionalne zastupljenosti političkih stranaka, koalicija, listi nezavisnih kandidata ili grupa članova, kao što je utvrđeno u Članu 13.5 ovog Zakona. Raspodjela mandata među kandidatima sa iste liste vrši se prema redoslijedu na listi kandidata za ove izbore.“

Imajući u vidu naprijed navedenu zakonsku odredbu, raspodjelom mandata iz Općinskog vijeća Centar Sarajevo u Gradsko vijeće Grada Sarajeva, prema utvrđenim rezultatima, bila bi delegirana tri vijećnika iz reda bošnjačkog naroda, jedan vijećnik iz reda srpskog naroda, tri vijećnika iz kategorije ostalih, te nijedan vijećnika iz reda hrvatskog naroda.

U skladu sa članom 23. stav (5) Statuta Grad Sarajeva, svako općinsko vijeće koje čini Grad Sarajevo delegira najmanje jednog kandidata iz reda konstitutivnog naroda. Općinsko vijeće Centar Sarajevo za Gradsko vijeće Grada Sarajeva, od sedam izabranih gradskih vijećnika, nije delegiralo najmanje jednog kandidata iz reda konstitutivnih naroda, **odnosno nije delegiran vijećnik iz reda hrvatskog naroda.**

Odredbama člana 23. stav (11) Statuta Grada Sarajeva propisano je „Ukoliko se ovako provedenim izborima u općinskom vijeću za Gradsko vijeće među sedam izabranih gradskih vijećnika ne dobije minimalno potrebna zastupljenost vijećnika iz pojedinog konstitutivnog naroda, kako je to navedeno u stavu 5. ovog člana, umjesto izabranog vijećnika za Gradsko vijeća s najmanjim količnikom iz reda naroda za koji je **i bez tog vijećnika zadovoljena minimalna zastupljenost**, delegira se općinski vijećnik pripadnik naroda koji nije zastupljen u potrebnom broju među delegatima iz tog općinskog vijeća, a koji je na kandidatskoj listi kojoj pripada sljedeći najveći količnik. Ukoliko na toj kandidatskoj listi nema kvalificiranog kandidata, utvrđuje se sljedeći najveći količnik i tako sve dok se ne dođe do kvalificiranog kandidata.

Imajući u vidu da raspodjelom mandata na način propisan članom 13.10 stav (2) Izbornog zakona BiH nisu zadovoljene odredbe člana 22. stav (2) i (3) i člana 23. stav (5) Statuta Grada Sarajeva preraspodijeljena su dva mandata i to jedan kandidatu iz reda hrvatskog i jedan kandidatu iz reda srpskog naroda, sa listi koje imaju najmanji količnik, a kojim postupkom se neće narušiti minimalna nacionalna zastupljenost.

Uvidom u ovjerene kandidatske liste iz Općinskog vijeća Centar Sarajevo utvrđeno je da se na kandidatskoj listi Kandidatska lista GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ na poziciji 4. nalazi neizabrani vijećnik **Stevanović Dragan**, kandidat iz reda srpskog naroda i da se na poziciji 6. nalazi neizabrani vijećnik **Majstorović Željko**, kandidat iz reda hrvatskog naroda.

Nakon pravednih posrednih izbora iz Općinskog vijeća Centar Sarajevo utvrđeno je da najmanji količnik imaju:

- a) Kandidatska lista POLITIČKA ORGANIZACIJA NAROD I PRAVDA (2,33),
- b) Kandidatska lista GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ (2,67) i
- c) Kandidatska lista KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA (3,00).

Na osnovu odredbe člana 23. stav (11) Statuta Grada Sarajeva, umjesto izabrane vijećnice Bosno Senade na poziciji pod rednim brojem 2. sa kandidatske liste GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ delegiran je neizabrani vijećnik sa iste liste na poziciji 6. **Majstorović Željko** iz reda hrvatskog naroda.

Nadalje, kandidatska lista POLITIČKA ORGANIZACIJA NAROD I PRAVDA ima najmanji količnik (2,33). Međutim oduzimanjem mandata vijećnici Lazarević Biljani iz reda srpskog naroda narušila bi se minimalna zastupljenost konstitutivnih naroda.

Na osnovu odredbe člana 23. stav (11) Statuta Grada Sarajeva, umjesto izabranog vijećnika za Gradsko vijeće Grada Sarajeva sa sljedećim najmanjim količnikom sa kandidatske liste KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA, **Katica Velija**, delegira se općinski vijećnik sa kandidatske liste GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ **Stevanović Dragan**, vijećnik iz reda srpskog naroda.

U skladu sa rezultatima koje je utvrdila Centralna izborna komisija Bosne i Hercegovine i naprijed navedenim odredbama, dodijeljeni su mandati sljedećim vijećnicima:

1. Jasmin Ademović (Bošnjak),
2. Lazarević Biljana (Srbin),
3. Lajla Ćosović (Bošnjak),
4. Nihad Uk (Ostali),
5. Amra Zulfikarpašić (Bošnjak),
6. Željko Majstorović (Hrvat),
7. Dragan Stevanović (Srbin).

Naime, odredbom člana 22 stav (1) Statuta Grada Sarajeva propisano je da se gradsko vijeće sastoji od 28 vijećnika, dok je stavom (3) istog člana propisano daje Bošnjacima, Hrvatima i Srbima, kao konstitutivnim narodima pojedinačno garantiran minimum od 20% mjesta u Gradskom vijeću, a grupi Ostalih najmanje 2 mjesta bez obzira na izborne rezultate.

Iz citirane odredbe proizilazi da u sastav Gradskog vijeća Grada Sarajeva treba ući, između ostalih, najmanje po 6 predstavnika srpskog naroda i hrvatskog naroda i 2 iz reda ostalih. Nakon završenog postupka utvrđivanja rezultata posrednih izbora i dodjele mandata iz četiri općine koje čine Grad Sarajeva, nacionalna struktura Gradskog vijeća Grada Sarajeva je:

Izabrani vijećnici u Gradsko vijeće Grada Sarajeva iz općinskih vijeća					
Općinsko vijeće Stari Grad Sarajevo	Općinsko vijeće Centar Sarajevo	Općinsko vijeće Novo Sarajevo	Općinsko vijeće Novi Grad Sarajevo		
Bošnjaci 4	Bošnjaci 3	Bošnjaci 2	Bošnjaci 3		12
Hrvati 1	Hrvati 1	Hrvati 2	Hrvati 2		6
Srbi 2	Srbi 2	Srbi 1	Srbi 1		6
Ostali 0	Ostali 1	Ostali 2	Ostali 1		4
7	7	7	7		28

Iako su irelevantni za rješavanje u ovoj pravnoj stvari navodi podnositelja žalbe o listama za Gradsko vijeće Grada Sarajeva su i neosnovani, imajući u vidu da je Centralna izborna komisija BiH od 29.01.2021.godine i 02.02.2021.godine ovjerila kandidatske liste za posredne izbore vijećnika u Gradsko vijeće Grada Sarajeva iz Općine Centar Sarajevo te da podnositelj žalbe na navedene odluke nije ulagao žalbe. Isto tako, Centralna izborna komisija BiH nema uticaj na prijedloge kandidata koje joj dostave političke stranke ili grupe vijećnika.

Iz odgovora na žalbu i stanja spisa, u vezi navoda podnosioca žalbe "da je politička organizacija građana Naša stranka, iako je imala kandidata iz reda srpskog naroda (Arslanagić Saru), istu nije kandidovala na listu za Gradsko vijeće, nego je povukla kandidata iz Doma naroda Parlamenta F BiH (Stevanović Dragana) koji se odrekao mandata i time ugrozio funkcionisanje kako parlamenta, tako i kluba Srba u tom tijelu" proizilazi da je Centralna izborna komisija BiH izvršila uvid u ranije dostavljenu dokumentaciju i utvrdila da je Arslanagić Sara mijenjala izjašnjenje, te da se na Općim izborima 2018.godine izjašnjava kao Ostali, dok se na Lokalnim izborima 2020.godine izjasnila kao Srkinja.

Isto tako, Izborni zakon BiH je dao izabranim kandidatima mogućnost odricanja mandata, te sama činjenica da se Stevanović Dragan odrekao mandata ne podliježe sankciji Centralne izborne komisije BiH.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
S U D I J A
Zvezdana Antonović**

